

22 MAC 2018

Guna 'Pooh' sorok pistol, peluru

DALAM NEGERI 29

Guna 'Pooh' sorok pistol, peluru

KOTA BHARU 21 Mac - Taktik dua lelaki cuba menyorokkan sepucuk pistol di bawah bantal karakter kartun Pooh tidak menjadi apabila polis menemukan senjata api tersebut dalam serbuan di sebuah rumah di Jalan Bunga Raya, Rantau Panjang, semalam.

Dalam kejadian kira-kira pukul 11.30 malam, selain pistol jenis Revolver .38 Smith & Wesson yang berisi empat butir peluru, polis turut menemukan sepasang gari di bawah bantal tersebut yang diletakkan di dalam sebuah bilik.

Pemeriksaan lanjut menemukan lima butir peluru serta dua kelongsong peluru yang diletak

dalam kotak rokok dan disembunyikan di bahagian dalam bantal.

Ketua Polis negeri, Datuk Hasanuddin Hassan berkata, pihaknya turut merampas satu pekot plastik lut sinar mengandungi dadah jenis syabu seberat 0.65 gram dan setengah biji pil kuda dianggarkan bernilai RM100 daripada suspek berusia 20 dan 26 tahun terbabit.

Menurutnya, turut ditemukan dalam bilik berkenaan ialah peralatan menghisap dadah.

"Kita telah menahan kedua-dua suspek dan pemeriksaan urin mendapati mereka positif dadah," katanya dalam sidang akhbar di Ibu pejabat Polis Kontinjen (IPK) Kelantan di sini hari ini.

Ujar Hasanuddin, kedua-dua suspek yang didapati memiliki rekod lampau dadah dan pecah rumah dipercayai menggunakan pistol berkenaan untuk melakukan kegiatan samun.

"Kita percaya pistol yang dirampas dibeli dari negara jiran dengan harga RM6,000.

"Suspek direman dan disiasat mengikut Seksyen 8 Akta Senjata Api (Penalti Lebih Berat) 1971 dan Seksyen 8 (a), Akta Senjata Api 1960 serta Seksyen 12(2) Akta Dadah Berbahaya 1952," katanya.

Tambah Hasanuddin, dalam tempoh 2016 hingga hari ini, polis Kelantan telah menahan seramai 84 individu membabitkan 50 rampasan pistol serta 1,351 butir peluru.